

感恩縣志卷十二

海防志

海防

環海水道

海寇附土寇

序曰易曰君子以除戎器備不虞又曰王公設險以守其國海防之設此其義也  
感邑地臨瀕海海氛不靖在所必虞是設備以固吾圉斯為保民之道然古今異  
時變動異形尤在臨斯土者之審時度勢豫為之防茲因紀前人之建議參以近  
世之運籌以備采擇志海防

感恩縣志

卷十二

經政

海防

一

海口海南書局承印

明代

洪武二十七年命安陸侯吳傑專訓練沿海衛所官軍以備倭寇設海南衛備倭指揮一員專轄  
內外十一所每所官各一員督管軍船於所部海面巡視有警申報剿除分別功罪瓊州府揚

威營備倭船禮船三隻蕭志

萬歷四十五年設水寨前司守崖州三亞保平感恩諸港兵船十一隻兵三百名分總一員捕舵  
兵二百九十七名

白沙寨艚船二十二隻長號槳船十五隻正兵二哨駐泊白沙港一自東下巡文昌清瀾會同至  
樂會博鰲港與三亞兵船會取樂會縣結報一自西下巡澄邁臨高儋州至昌化英潮港與三  
亞兵船取昌化縣結報又遊兵二哨駐三亞港一自東上巡陵水萬州至樂會博鰲港與白沙  
兵船會取樂會縣結報一自西上巡感恩魚鱗洲昌化英潮港與白沙兵船會取昌化結縣報

營冊

清代

道光十二年奉准以海口水師副將移駐崖州改為崖州協副將定為外海水師烟瘴邊疆要缺

由外題補其原設水師營守備一員仍專管本標水師營務與副將輪替出洋巡緝大小師船四號除防守各臺汛外實在巡洋兵丁一百四十六名分巡洋面東自萬州東澳港起西至昌化縣四更沙止（營冊）

崖州協上班以副將出洋下班以守備出洋專巡本營洋面向無會哨章程道光十七年護道張培春議請每年定期以十月初十日與儋州營舟師齊集昌化縣四更沙洋面會哨一次文武俱結報奏准遵行（府志）

### 環海水道

自昌化新港南二十里爲縣屬北黎港水深隨時可入大小船隻

北黎港迤南二十里有八所港港外有魚鱗洲灣可泊小船

八所港迤南四十里有延澄港遇潮大時船方可入

延澄港迤南二十里有北溝港通塞不常

北溝港迤南一十二里有縣門港潮大時可出入商船

縣門港迤南四里有烏石角海外有浮沙一道行船避之沙南二里有青草灣北風以泊船

## 感恩縣志

### 卷十二

經政 環海道水

二

海口海南書局承印

烏石角迤南十二里有板橋港小船可入通塞不常

板橋港迤南十二里有下園港又名南港小船可入

下園港迤南二十五里有嶺頭灣北風可以泊船

嶺頭灣迤南一十五里有白沙港

白沙港迤南二十里有丹村港稍南至鶯歌角與崖州洋面分界

白沙港距城南七十五里港口有沙礁小船可容大船難進迤南二十里至丹村港有潮可進小

船丹村港南十五里至崖縣鶯歌灣頭有繒寮又有石碑船駛須離岸二十餘里夜過須防

鶯歌灣南七十里至望樓港亦名榕村港潮滿水深八九尺可泊大船十餘港口西南十里有

沙一道離岸三十里望樓港東五十里至酸梅角離岸四十里有東西玳瑁二洲東洲有石龍

偏西有石碑內外皆可過船又東三十五里至保平港潮滿水深丈餘或五六尺可容大船十

餘保平港東十五里至南山嶺嶺角水深一丈沙底有礁北風可泊南山嶺東十五里至紅塘

灣水深可寄棹紅塘灣至三亞港八十五里港面闊大水深可泊船數百港外白礁嶺角水深

九尺泥底東南風可泊嶺後大灣東北風亦可泊港西南大小玳瑁洲有礁不可泊中有雙礁

出水三亞港東二十里至榆林港海面遼闊水深山高能避颶風可泊輪艦吾瓊軍港惟此可建榆林港東三十里至玳瑁灣水深二丈五尺內外有三洲可泊船數十東北風灣外亦可泊玳瑁灣東二十里至鐵爐港本深八尺港外東南二十里有古崎洲鐵爐港東三十里至合口港潮滿水深七尺藤橋港東三十里至陵水縣赤嶺港港東八十五里至桐棲港水深丈餘可泊船數十港內有礁外有白石水深一丈五尺泥底內外皆可泊東北風亦可避桐棲港東三十里至黎菴港口水深內有礁可泊船數十黎菴港迤北四十里至萬寧雙蓬石周圍百丈上出燕窩船過無妨雙蓬石北二十里至分界洲內外皆可過船分界洲北七十里至甘蔗洲水深一丈沙底東北風可泊甘蔗洲北六里至大洲灣內外皆可過船洲頭灣口水深四丈西南風可泊船五六隻洲尾白沙灣水深二丈可泊船數隻洲東接大洲洋有千里石塘萬里長沙爲瓊洋最險之處大洲灣北二十里至細花山山外可過船山內有礁細花山北十里至大花山水深二丈南風可泊船數隻角內有礁大花山北十里至那樂港港口淺窄潮滿水深八尺港神俗忌猪肉勿以奉之那樂港北七十里至樂會縣博敖港港口水深七八尺巨石林立非本港小艇爲嚮導不能入港外雖有礁水深可過船西南角一帶沙地可寄棹博敖港北二十

里至瓊東縣潭門港潮滿水深七尺可泊船十餘隻潭門港北三十里至臨同灣西北風可泊船數十灣外有礁進船湏擇淨處臨同灣北二十里至沙篔港潮滿水深七尺有礁沙篔港北十里至長岐港大船不能進長岐港北二十里至文昌縣馮家灣水深八九尺北風可泊船十餘馮家灣北四十里至清瀾港水深港闊近年亦思開商埠但北向海水蒼茫無外沙迴抱難以防風災今竟棄之亦無生意清瀾港北六十里至銅鼓嶺大灣海口底多石礁南北風可泊船數十又有小灣可泊船數隻東北對七洲洋北接硃洲東通大洋銅鼓嶺北六里至抱凌港有礁大船不能進抱凌港西十里至加定角西南風可泊船五六隻但有礁要擇無礁處下椗加定角西三十里至抱虎灣小船潮滿可進灣外有礁淨處可寄棹抱虎灣西四十里至烏石仔西南風可泊船數隻烏石仔西五十里至急水門外有沙澗三十里沙澗闊十餘里內外可過船木蘭山角有石龍一二里水乾衝浪山角有礁離沙一里船過即入急水門要小心審視流沙門長十里沙頸東北有抱虎沙亦長十里又有七洲沙長八十里山北二十里有沙角頭再北八十里有銅鼓沙長二十里闊三四里沙頂水深一丈沙側深二丈沙澗深六丈船過無礙銅鼓沙西北二十里又有羅斗沙一帶有一瀝介在二中沙數沙有風則打浪出急

水門即至木蘭頭灣內東風可泊船數十木蘭頭西五十里至七星嶺嶺西新舖灣水深七尺東南風可泊船嶺角離岸百丈有礁水深船過無礙七星嶺西三十里至舖前港口外上角有礁下角有沙離岸百餘丈水深皆可過船港口亦有沙中有瀝進船水深八尺港中東有礁西有沙入至礮台可寄棹不能避風自港口上角駛六七里至舖前沙長三十里闊三四里量水至一丈五尺即出沙口直駛西北避沙角東風架甲庚位半更可到白沙角自舖前至瓊山縣白沙港五十里潮滿水深八尺可泊大船數十白沙港至牛矢港外可寄棹再駛二里即至海口此瓊治之門戶也（參府志崖志）

自海口西南向回感二里至鹽竈港外可寄棹鹽灶港四里至小英港水深二丈南風可泊船數百小英港四里至紅沙角角外上下有暗礁離岸百數十里乃無虞紅紗角五里至北脯灣埋邊沙岡有繒寮北邊又多暗礁船不可近繒門下水深可寄棹北脯灣五十里至澄邁縣東水港可泊船數十港外南灣南風亦可泊東水港五十里至花場港多沙礁船進必偏西從沙邊入過沙頭可避颶風花場港十五里至臨高縣馬裊港水深八尺可泊大船十餘但港口上下有礁須小心進之馬裊港三十里至石牌港船過石牌須離岸二百五十丈進港必偏西而入

## 感恩縣志

### 卷十二

經政

環海道水

#### 四

海口海南書局承印

至礮台邊可避颶風石牌港迤南四十里至臨高角上有燈樓東風架乾巽位可過石欄離岸八里有石龍臨高角南三十里至安全港港外皆礁東北邊可泊船入內港最要小心水深五六尺又南一里至後水港港外多礁港內泥底潮滿水深七尺可避颶風後水港南三里至山尾離岸十里有沙闊五里水深四丈轉過沙尾駛甲寅位約三四十里有一帶石名將軍印闊六七里長三十里印內有瀝泥底水深四丈可過大船可避大風南風亦無礙山尾南十一里至兵馬角水深九尺泥底東南風可泊船數十角上有石欄水深六丈船過無防兵馬角南六里至儋縣鵝門港港口有散石潮落內外皆乾潮滿水深七尺小心可進大風能避船數隻鵝門港南五里至南恆港港內外與鵝門同南恆港南八十里至西浦角角南至洋浦港水深可入四五百噸之輪船上有石山曰尖辰山稍入曰新英港港外有一帶石名三牙牌水乾出面量水三丈下帆可過駛盡牌尾向南駛入沙瀝水深無礙港口有沙一道出入最忌牌尾正西約十里遠即紗帽頭一帶皆有暗礁船隻往來須要小心洋浦港南三十里至田頭涌向北二里有礁一帶長十餘里闊三里上至東北邊五六里水深二丈船過無礙田頭涌南二十五里至紗帽頭有沙礁水乾可見紗帽頭南二十五里至海頭港可泊船數十港外東西有暗礁海

頭港南三十里至昌江縣海尾港有礁水淺不可進船海尾港南五十里至棋子灣東南可泊船數隻自棋子灣駛二里便有暗礁名棋子石石下有沙過此至英潮港港闊水深可容船數百英潮港南三十里至三洲門有三口沙一道港口亦有沙礁不可進船港外西北二十里船過無防三洲門南五十里至四更沙沙口水深二丈北邊見沙打浪轉入沙灣內東南風可寄旋此處沙線最險舟人視爲畏途海舶往來或遶出大洋避之四更沙南十五里卽至縣屬北黎港云

# 海寇

清

順治五年冬海寇陳武僞號總兵官據崖昌感各州縣（昌化縣志）分黨駐感恩北鄉三所以抗官軍日肆虜劫居民逃散村落爲墟今蘇屋白奧大磚坡皇寧小嶺諸村皆竄匿之遺民也

（採訪）

康熙十八年海寇楊二楊三等駕船四十餘衝入澄邁石礮由顏張港登岸劫掠感恩昌化海濱一帶旣而黎酋勾通土宄自森山市焚掠至打鐵市子女玉帛搜括無遺又以舟重難行揚言被擄子女許父母親戚持金往贖否則投之海當事慮民通賊嚴禁止之十月賊船二十餘寇感恩勢甚猖獗十一月圍感恩縣城兵民固守倉卒不能破乃去（府志）

康熙四十二年有賊船三十餘集劫掠東西兩路洋面相傳楊二餘黨民情震恐十二月賊入嶺頭港知縣姜焯督民兵拒却之（縣志）

道光二十三年海寇梁亞球率匪船幾十隻黨徒數百人守兵寡不敵衆攻入縣城連搶三日居民財帛一掠而空知縣夏 逃匿被擄去太太并縣印落船勒贖錢壹千餘串後查覺係本

## 感恩縣志

### 卷十二

經政

海寇

### 六

海口海南書局承印

土淫婦石蘭觀引喜蓮洋香四人勾通指點經拏獲正法（採訪）

光緒二十二年七月初七夜有海匪幾十人突入縣署搶劫知縣盧芳林財物皆空連夜遁去不知所踪

光緒二十六年十月十一日有海匪幾十人設計假水師送賊來城甫至境勇民圍觀甚多匪疑機露擊斃縣勇二人直入署劫掠知縣徐政財物城民敵之被傷三人

民國元年四月十二日海匪二百餘人由四更灣登岸器械犀利民逃不拒率入北黎市搜掠通市商店滿載而去并傷市紳史經一人

民國五年西南各省護國軍討袁四方民軍蜂起響應縣知事黃炳煊先逃四月二十四日陽江匪首馮蘭波乘機冒民軍名目率匪黨數十人蜂擁入城假張佈告人不及防被擄商民數人落船勒贖錢八百千文并劫港內商船一隻貨物甚多

土寇附

光緒六年土匪李用興儋州人盤踞北黎市邀結無賴爲黨勒索鄉民強佔幼女無惡不作北黎紳耆密稟城守蔣模帶兵擒斬之

十二年儋州匪陳宗明踞北黎市私造國刑禁人勒贖北黎紳耆密稟知縣劉紹乙轉詳上憲派瓊州總兵陳兆興帶兵緝捕機露竄黎崗兆興設計將哨官扮商人入黎貿易同宗明結爲義友誘出海頭市擒解瓊郡正法梟首回縣示衆

二十六年高州會匪潛入縣屬散居佛羅市鹽田村等處勾串文質村土匪何贊朋聯盟結會號曰三點劫商船掠村市闔屬騷然時有該匪村人王家振周烏牙起六點會拒之因勢孤不敵密稟知縣徐政齊集鄉勇會同水師守備黃光美分水陸兩路圍捕獲匪首何贊朋及黨徒七名就地正法餘黨黃呵儒竄入黎境烏槐村邀黎人時出尋復

民國十一年儋縣土匪張耀南率其黨徒百餘人抵感暗結土匪蘇桂森計畫作亂因被縣長王道熙偵知以衆寡不敵潛行下鄉籌謀抵禦張匪遂佔據縣署私刊木印張貼布告旋被道熙率領民軍圍攻張匪倉皇南遁又糾黨盤踞崖縣未幾崖縣縣長孫毓璜集兵攻勦悉殲之十一年城內蘇桂森素行不軌目無官民適民選縣長時期桂森勢力運動以爲垂手可得迨縣長王道熙被選蒞任益滋妒忌虎視眈眈十二月二十日值月姑七差黎糧出納遂糾黨抗官佔取稱兵城下四境騷然時縣長行署已北移通天越歲正月初十爲團長麥建猷攻敗火其

## 感恩縣志

### 卷十二

經政

土寇

### 七

海口海南書局承印

居室蘇匪逃亡山村賊心未泯復糾集黎漢匪徒撲城三次雖不得逞然擾亂縣城及各村民衆肉戰心驚日不聊生者三年有餘民房被燬百餘間百姓被戕二百餘命家產損失道路流亡慘不忍言十四年秋蘇匪天誅其亂迺止

## 海防條議

總制胡宗憲曰夫謂之海防者則必宜防之於海國初每衛各造大青及風尖八槳等船百餘隻更番出洋哨守海外諸島皆有烽墩可泊後弛其令列船港次每於風汛時協軍巡哨使不得越島深入則內地可以安堵總兵俞大猷亦請設樓船艙船數百隻分伏諸島往來巡探攻捕名之曰遊兵而遠遏之於大洋之外議者多是之或謂海棲經月必有颶風巉崖複礁廉厲倖劍戟不可下椌是邀擊海上之難也蓋海戰之弊有四萬里風濤不可端倪白日陰霾呎尺難辨一也官有常汛使賊預知趨避二也孤懸島中難於聲援三也將士利於無人掩功諱敗四也自嘉靖己卯後禦洋之法立哨探嚴緊官得預備則藩籬之守其法終不可廢故必哨賊之遠洋而不常厥居擊賊於內洋而不使近岸斯策之最善而當時之議亦卒未有能易此者也原賊之起其初甚微止一二人密約三五人潛至港口窺伺小艇附岸經跳登舟露刃脅舟人駕出外港遇其畧大之漁船則詐稱買魚又跳而上再集匪類至十餘人便敢公然行劫此粵東所謂踏斗者也出遇商船則亂流以截之稍近則大呼落帆商船自度無砲火軍械不能禦

## 感恩縣志

### 卷十二

經政 海防條議

### 八

海口海南書局承印

敵又船身重滯難以走脫聞聲落帆惟恐稍緩相顧屏息候賊登船網繫賊或收其財物將船放回或連船劫駕他往雖不願從亦暫相依以冀旦晚劫換一入其黨則與之化日久日多遂分爲一二船勢漸以大此等小輩無他伎倆但使商船勿則惶恐下帆又有砲械可以禦敵賊亦何能爲乎愚以爲商船皆有身家斷不敢思爲匪以自葬其身家性命而且一船下水必有族鄰鄉保具結地方官驗烙號給與護船牌照方敢出外貿易此等有根有據之人豈不可信而必禁携槍砲使供手聽命於賊乎倘弛商船軍器之禁則不出數月洋賊盡爲餓殍也哨船之不能禦賊皆謂萬頃渺茫從何捕起風濤險惡性命可虞不知賊船在近不在遠沿邊島澳偏僻可以停泊之區時往搜捕百不失一蓋各省匪類性雖不同然皆必有澳可避風颶乃能徐俟商船之往來必待天朗風和乃敢駕駛出洋以行劫其貪生惜死之心同其哨緝之方堵截之候無不同也向來各省巡哨實心者少每欲出巡則預張聲勢揚旆徐行一二月未離江干又於船中且暮鼓樂舉砲作威是何異呼賊而使之避也若使巡哨官兵密坐商船以出勿張旗幟勿鼓樂舉砲作威逼賊船嚮邇可追則追不可追則佯爲遜避之狀以堅其來挽舵爭據上風上風一得賊已在我跨下我則橫逼賊船如魚比目並肩不離順風施放砲火百發百



中兩船既合則火罐火藥桶一齊拋擊雖百賊亦可擒也所有銀錢貨物盡賞士卒勿許將弁自私自利首功兵丁拔補把總將弁以次陞遷無得掩抑則將士之功名財利俱在賊船將不遑寢食以思出哨也（藍鹿州集）

提督李增論曰水戰較陸戰難外洋較江河更難海濤汪洋颶颳靡定水師一出則士卒之身命托於統兵之人故將首在得人將如腹心兵如指臂同心報國協力戰賊此必勝之師也然使水程不知遠近流潮不知消長順逆舟船駕駛不靈砲械運用不準卽幸濟一時而難於屢試是不可以不預矣

知縣姜焯議曰漁船連伍誠籌畫周詳弭盜之上策但查漁船例不許隨帶器械今若令其連伍斷不能徒手從事器械任其備辦誠恐中有不肖乘便作奸亦無可定至於現在海賊非水師不能爲力卽如感恩一邑陸路山林率令捕巡鄉保時時稽察沿海港口督同汛兵練勇晝夜防禦是以匪類從無潛匿山林而陸路永稱靖謐第水路向無營汛倘遇賊船臨海止能在岸堵禦雖隔咫尺恍若千里故賊船任意飄泊得以肆行無忌爲今之計至要而最隱者莫如水師遊巡之法將海口水師左右二營令其一營存兵一半坐鎮扼要一營領兵一半沿海遊巡

## 感恩縣志

### 卷十二

經政 海防條議

### 九

海口海南書局承印

輪流更替週而復始度全瓊海面大勢順風十日可周或風有不順十八九日可周按定一日一次以其行船俱近岸邊一遇大風隨在沿口可以灣泊非若大洋險阻難以迴避故可決以時日也兼責沿海地方官每月出具哨船到境日期印結繳報查核庶皆實力奉行永保無虞且水師不比陸路有跋涉之苦况彼熟習水性設或遇敵輕車熟路如取如携其海上小醜聞知有備無不遠避縱使乘風飄至不難相機剿捕倘或衆寡不敵亦能掣肘海面斷不敢如從前任意飄泊曠日持久窺伺海上也如此則陸路汛兵捍禦水路則舟師巡捕雖有匪類亦無置足之地矣（舊志）

姜焯遺參將書畧云感恩一邑面山枕海延袤三百餘里查舊設塘汛墩臺佈置分防相隔寫遠或致聲援不及恐有顧此失彼之患總緣額設兵丁本少以一縣之汛地防兵僅比崖州十分之一况今歲海氛游弋處處堪虞蒙鎮臺碩畫周詳遣官兵遊巡堵禦并酌要地分撥貼防良法美意靡不周至但查感邑額兵八十六名內北黎營二十六名感恩白沙南港通天十所北黎六塘每塘撥兵三名共一十八名俱係要地無可游移惟感恩港舊設二十二名今因存城兵寡酌調往來業已難於兼顧再查嶺頭板橋八所三處地方俱有港汊可以泊船舊設墩臺

撥兵防汛殊爲周密不知何年撤去此二處雖俱屬要汛然板橋距縣二十里八所距北黎營二十里應撥兵五名可以兼顧無虞惟嶺頭地方距縣城四十里附近並無村庄而地方更爲遼闊况港汊平坦易爲游魂窺伺必湏撥兵二十名庶可防範堵禦凡此俱屬要汛添兵刻不可緩貴府誼切同舟諒無歧視希賜選擇精銳永鎮防守其於保固疆隅利賴誠不淺也（同上）

按康熙四十三年總兵范時捷巡視邊海建議添兵奉督撫行文查議知縣姜焯請添設兵防四十四年九月奉批准於感恩縣嶺頭地方撥崖營兵一十八名設汛防守

范時捷條議曰感恩縣有大港二一曰北黎港離縣甚遠港大而險必空船方可出入崖州營撥管隊一名帶兵二十五名防守佈置得宜一曰感恩港俗呼縣門港離城三里此港潮退不能進船舊制崖州營撥管隊一名帶兵一十七名防守查此項目兵久與防城之兵同住城內大非循名責實之義應令防港目兵在港面地方住筍且經躡勘該地平闊堪以安營所當亟行者也又有地名嶺頭墩者（一名嶺頭灣）離縣六十里此地宜防歹船灣泊取水舊設墩臺一座兵二名瞭守以杜奸歹（府志）

## 感恩縣志

### 卷十二

經政

海防條議

十

海口海南書局承印

守禦之方防微爲上所謂防微者亦申保甲之制而已今請鄉立一老自相管攝十家爲甲百家爲鄉出入互相覺知行檢互相糾察寇盜互相守望則沿海之民安能挺身潛跡獨出爲非耶不幸有聚衆飄洋者制之有三要焉凡賊入俱由海港扼海港則入劫無路久自困矣復防奸民與通餽之粟米餽之酒肉餽之利器絕其內交久自困矣又扼沿海之山沿海山出泉流爲溪澗水清可食賊飄據洋中水鹹鹵以食則瀉以類則皮潰賊乏清水久自困矣此大畧也

（霍謂厓集）

賊至不能禦之於海則海岸之守爲緊關第一義賊新至飢疲巢穴未成擊之猶易延入內地縱盡殲之所損多矣然自來沿海戍守莫不擁城觀望幸賊空過謂可免罪而不顧內地之有警內地戍守亦幸賊所未到而不肯策應沿海今宜分定沿海保護內地內地策應沿海沿海力戰倘有所損宜坐內地不能策應之罪內地有警沿海幸完宜坐沿海縱賊之罪又如同一樣沿海地方賊由此方登岸此方却不擾累而擾累彼方賊由彼方登岸彼方却不擾累而擾累此方自來惟坐地方擾累者之罪今宜并坐賊所從入其沿海文武將吏有能連次屢戰抵遏賊鋒阻賊下船不得登岸深入者雖有首級以奇功論（唐荆川集）

案此皆從前防海之策籌畫得宜今海禁大開每縣海濱有一小輪船梭巡海濱相連互應出發神迅尤爲防守制勝之策

感恩縣志

卷十二

經政

海防條議

十一

海口海南書局承印